

Date – 31/12/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Governor thar General (Dr.) Vijay Kumar Singh-a chu kumthar January ni 9 ah Raj Bhavan-ah rinawmna thutiamtira lakluh a ni ang.**
- 2. Sorkar laipuiin Raltlante tana a thlawna semtur Buhfai, Mizoram Sorkar a pek atangin Lawngtlai District ah Buhfai Quintal 2526 sem a ni.**
- 3. Sorkar laipui chuan Digi Yatra data hmanga chhiah pumpelth beihpui thlakna atana media report chu a hnawl.**

<><><>

NEW GUV

Governor thar General (Dr.) Vijay Kumar Singh-a chu kumthar January ni 9 ah Raj Bhavan-ah rinawmna thutiamtira lakluh a ni ang.

Governor thar lakluh dan tur hi nimin khan Chief Secretary Pu Khilli Ram Meena hovin CS Conference Hall, MINECO-ah rel a ni a, Governor thar tur hi January ni 8-ah Aizawl a lo thleng anga, a tuk January ni 9-ah Mizoram Governor atan lakluh a ni ang.

Governor thar tur hi Chief Minister hovin Minister ruatte leh Official pawimawh engemawzatten Lengpui Airport-ah an hmuak ang a. National Salute leh National Anthem te nen dawnsawn a nih hnuah Raj Bhawan panpui nghal a ni ang.

Governor thar tur hi Chief Justice of Gauhati High Court-in a lalut dawn a ni.

He hunah hian Chief Minister, Council of Ministers, Speaker, Dy. Speaker, Mizoram MP te pahnih leh Officials pawimawhte bakah sawm bikte tel kim thei tura sawm leh beisei an ni bawk.

Puan tawh thin angin Odhisa larsap Raghubar Das banna President Droupadi Murmu-i'n a pawm tak avangin Thawhlejni kal ta tlai lamah khan state thenkhat a larsapte awmna siksawi a ni a. Mizoram larsap thar atana ruat General Vijay Kumar Singh hi India ram sipai lal ber (Chief of Army Staff) 24-na a ni a, Indian Army atanga a chawlh hnuah Politics-ah a lut a, kum 2014 leh 2019 Lok Sabha Inthlanpuiachte khan BJP ticket-a dingin Ghaziabad, Uttar Pradesh atanga thlan tlin a ni a. Prime Minister Pu Narendra Modi kaihhruai term khatnaah khan Minister of State for External Affairs, Minister of State (Independent Charge) for DoNER leh Minister of State for Statistics and Programme Implementation-te a chelh a. A term hnihnaah khan Minister of State for Road Transport and Highways leh Civil Aviation-te a lo chelh tawh bawk.

<><><>

NEW YEAR PREP

Kumhlui thlaha kumthar lawm turin state mipuite ngawrh takin an inpuahchah chho mek zel a. Vawiin kumhlui thlahni ah hian Aizawlah chuan Canteen kual leh Canmari inkarah lirthei tlan phal lohna, No Vehicle Zone siam a ni leh ang.

Aizawl khawchhung hmun hrang hrang tlawhtu kan corr chuan Aizawl dawrkai pakhat chuan Pawisa a vang tih thawm a tam thu sawiin inhralh pawh kumin hian a harsa zuala an hriat thu a sawi a, mipui chhuak vak erawh kum dang ang tho a an tam thu leh mipui vei vak hrim hrim thil lei ni lemlo an tam nia a hriat thu a sawi a. Kum dang aiin inhralh a har lutuk lo a ni a ti bawk.

<><><>

MPCC

Mizoram Pradesh Congress Committee kaihhruaiin Lal Thanhawla Auditorium ah Dr Manmohan Singh a sunna hun nimin khan hman a ni a.

He hunah hian Congress Working Committee Member, Chief Minister hlui Pu Lal Thanhawla chuan Dr Manmohan Singh sunna thu a sawi a, Dr Singh-a chuan Mizoram tum 5 a tlawh ni a sawiin, November 2008 ah campaign turin a rawn kal a, kum 2013 November thla vek khan campaign turin a rawn kal leh a ni, a ti a. Hetiang mi ropui, Mizoram pawh hria, rawn tlawh ve zeuh zeuh thin leh rawn duhsaktu chan a ni ta mai chu a vanduaithlak hle a ni a ti.

Dr Manmohan Singh-a chuan Anti-Terror Law tam tak a siam a, India ramah thisen chhuahna thleng nasa lutuk chu Congress sorkar laiin tihreh a ni thin a, a bultumtute an fakawm thin a ni a ti a ni.

Dr Manmohan Singh chu India ram economy chawi sangtu a ni a ti a, tun thlenga Mizo mipuiten an chhawr tangkai em em MGNREGS leh RTI te a hunlaia duan chhuah niin a bultumtu a ni a ti bawk.

He hunah hian MPCC President, Pu Lal Thanzara chuan thusawiin, Dr. Manmohan Singh te chhungkua chu inngaitlawm tak an ni chu an entawn tlak hle a ni, a ti a. Mizoramah Dr. Manmohan Singh-a sunna neih hi tul an tih thu leh state kilkhawr tak hmangaihtu chân a ni chu a uiawm hle a, channa nasa tak a ni a ti.

Economist ropui, India ram sum leh pai dinhmun siamtha tu a ni thu leh Mizoram pawh a duhsakin Planning Commission a awm lai pawha special package hmanga NLUP atana cheng vbc 2800 petu a nih thu a sawi a ni.

Sunna hun hi MPCC Vice President Pu RL Valla'n a kaihruai a, Pu Ronald Sapa Tlau chuan Dr. Manmohan Singh chanchin a sawi a, sunna hun hmang kalkhawm ah hian kalkhawm an thahnem hle a ni.

Puan tawh thin angin Dr Manmohan Singh hi Kum 92 mi niin Dec 26 zan dar 9 leh min 51 khan New Delhi AIIMS ah a thi a. Amah sunna hun hi ram pumah ni 7 chhung January ni 1 thleng neih a ni dawn a ni.

<><><>

REFUGEE AID LAWNGTLAI

Sorkar laipuiin Raltlante tana a thlawna semtur Buhfai, Mizoram Sorkar a pek atangin Lawngtlai District ah Buhfai Quintal 2526 sem a ni.

Lawngtlai DC, Pu Cheemala Siva Gopal Reddy-an Akshvani corr a hrilhdanin Lawngtlai District ah Myanmar leh Bangladesh atanga Raltlan awmte hnen ah Buhfai hi Quintal 2526 a thlawnin pekchhuah a ni a, mipakhat tan KG 31.5 pek niin, a thlawna Buhfai sem dawngtu hi an vaiin mi 8020 an ni.

Kumin November 11 khan Lawngtlai DC Pu Cheemala Siva Gopal Reddy hovin Raltlante hnena a thlawna Buhfai semchhuah bultanna hi Kanaan Refugee Camp, Chandmary, Lawngtlai ah neih a ni a, hemi hnu ah a remchandan angin semchhuah nghal ani.

Sorkar in an harsatna hriaa, a thlawna Buhfai a pe chu Raltlante chuan lawmawm an tih thu an sawi a, an belh khuate leh District mipui, Kohhran leh Tlawmngaipawl ten an chhawmdawl thinna ah lawmthu an sawi.

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchintha hi puan leh a ni ang.

<><><>

CHHINGCHHIP

Chhingchhip Mualpui nu pakhat Truck chil nia hriatin nimin khan a thi.

Nimin chawhma dar 9:30 vel khan Chhingchhip Mualpui a mi, Pi Laldusangi kum 25 Pu Lalrintluanga nupui chu Chhiahtlang atanga hmar lam KM khat vel, Paihte lui bul kawngsirah, a kawng leh tái vela hliam na tak tuarin thi chhàwnga hmuh a ni a, Serchhip Damdawi in panpui a nih hnuah chawhma dar 11:30 vel khan a hliam tuar lovin a thi.

Pi Laldusangi te hi kum 2020 a innei, fa pakhat nei a sùn tawh an ni a. A pasal nen a nu leh Pa te awmna Chhiahtlang Chhim vengah kumthar hmang tûrin 2-wheeler in an kal a. An bag an thlah avângin a pasal hi amahin a tlân lét leh a, chutia a thang chung chuan Pi Laldusangi hi hliampui tuar, biak hleih theih lovin a lo awm a. A hlim chhàwnah thil awmzia an zawh pawhin engmah a hriat loh thuin a chhang a ni.

Mi tlawm ngai ten hliam hi bawihsâwmin, Police ah report vat a ni a. A chiltu nia rinhlelh hnam dang motor lian pahnih, Serchhip chhim lam kawt

chhuahah Police duty ten lo tidingin, hêng Truck, oil phur chi khalhtute hi an tlanbo nia hriat a ni a, police ten thil ÷ul hrang hrang an buaipui mek a ni.

<><><>

FIRECRACKERS

Kumhlui thlah zana halpuah leh halmawi lam chi hal lo tura khauh taka thupek sorkarin a chhuah hnuah, cheng nuai 23 chuang hu halpuah leh halmawi te man a ni tawh.

Kan corr thudawn danin, Aizawl District ah tun thlengin hemi kaihhnawihah hian thubuai 10 ziahluh a ni tawh a, dan bawhchhia mi 13 man an ni tawh baw k a, Police ten halpuah leh halmawi an man tawh zat hi cheng nuai 23, sing 1 sang 5 & 135 a tling a ni.

Pathianni zan khan Aizawl PS staff te chuan an thudawn bawhziin Aizawl Bethlehem Vengthlanga chenna in pakhat an dapnaah halpuah leh halmawi cheng sing 4 & 4506 an man a, he in neitu C Lalbiakfela mi 39 mi chu man nghal a ni.

<><><>

DIGI YATRA DATA

Sorkar laipui chuan Digi Yatra data hmanga chhiah pumpelh beihpui thlakna atana media report chu a hnawl. Civil Aviation Ministry chuan Digi Yatra chungchanga report te chu thu dik lo ani tih a ti Chiang a, khualzinte data chu India tax authority te nen a insem anih loh thu a sawi baw k. Minister chuan Digi Yatra chu ramchhung khualzin te tan chauh a duan anih thu leh rampawn a zin veivak te a huam loh thu a sawi a, Income tax Department pawhin tun dinhmun ah hetianga hmalakna hi a awmlo tih an sawichiang baw k. Digi Yatra hi airport checkpoint hrang hrang a khualzinte nena inkhawih kherlo a awlsam tak a kal theihna tura hriat theihna khawl an hman a ni

<><><>